





廣弘明集卷第二十七上

唐釋道宣撰

戒功篇第七

情寄懲約縱則驕陵
欲階聖檢匪斯不震

序

夫羣生所以久流轉生死海者良由無戒德之舟楫
者也若乘戒舟鼓以慈棹而不能橫截風濤遠登彼
岸者無此理也故正教雖多一戒而為行本其由出
必由戶何莫由斯戒矣是以創起道意先識斯門於
諸心境籌度懷行其狀如何故論云夫受戒者慈悲
為務於三千界內萬億日月上至非想下及無間所

有生類並起慈心不行殺害或盡形命或至成佛長
時類通統周法界此一念善功滿虛空其德難量惟
佛知際不殺既爾餘業例然由斯戒德故能遠大所
以上天下地幽顯聖賢莫不憑祖此緣用爲基趾經
不云乎戒如大地生成任持出有心發是曰生也聖
道良資是曰成也法延六萬是曰住也保住三業是
曰持也諸餘善法蓋闕此功有入此門便稱聖種乖
斯妄立是謂凡流長沒苦海出濟無日自法移東夏
千齡過半在魏嘉平方聞戒法自爾迄今道俗流布
然大聖垂教知幾厥先故使俗士憲章則有具有缺

道人律儀有小有大所以五戒八戒隨量制開對境
無非戒科約分在其力用是謂接俗之化不可定其
時緣出家據道異於俗流備足時緣無開階級雖復
位分大小兩學就行齊均上下五衆約過品類乃殊
結正同存一戒戒者警也常御在心清信所存聞諸
視聽故撮舉數四知奉法之有人焉

與隱士劉遺民等書

彭城劉遺民以晉太元中除宜昌柴桑二縣令值廬

山靈遠足以往而不反遇沙門釋慧遠可以服膺丁母憂去職入山遂有終焉之志於西林澗北別立禪坊養志閒處安貧不營貨利是時閒退之士輕舉而集者若宗炳張野周續之雷次宗之徒咸在會焉遺民與羣賢遊處研精玄理以此永日遠乃遺其書

釋慧遠

每尋疇昔遊心世典以為當年之華苑也及見老莊
便悟名教是應變之虛談耳以今而觀則知沈冥之
趣豈得不以佛理為先苟會之有宗則百家同致君
諸人竝為如來賢弟子也策名神府為日已久徒積
懷遠之興而乏因籍之資以此永年豈所以勵其宿
心哉意謂六齋日宜簡絕常務專心空門然後津寄
之情篤來生之計深矣若染翰綴文可託興於此雖
言生於不足然非言無以暢一詣之感因驥之喻亦
何必遠寄古人

於是山居道俗日加策勵遺民精勤
備至具持禁戒宗張等所不及專念

禪坐始涉半年定中見佛行路遇像佛於空現光照
天地皆作金色又披袈裟在寶池浴出定已請僧讀
經願速捨命在山一十五年自知亾日與眾別已都
無疾苦至期西面端坐歛手氣絕年五十有七光作
篤終誠曰皇甫謐遺論佩孝經示不忘孝道蓋似有
意小兒之行事今即土為墓勿用棺槨子雍從之周
續之等築室相次各有芳績如別所云

與蕭諮議等書

梁元帝

蓋聞圓光七尺上映真珠之雲面門五色旁臨珊瑚
之地化為金案奪麗水之珍變同珂雪高玄霜之彩
豈不有機則感感而遂通有神則智智而必斷故碧
玉之樓升堂未易紫紺之殿入室為難必須五根之
信以信為首六度之檀以檀為上故能捨財從信去

有卽空率斯而談良可知矣竊以瑞像放光倏將旬
日蹈舞之深形於寤寐扑躍之誠結於興寢稍覺十
字之蒸嗤何曾之饌五鼎之味笑主偃之辭竈羹麟
脯空聞其說羊酪猩脣曷足云也困于酒食未若過
中不餐螺蚶登俎豈及春蔬爲淨欲吾子三日潔齋
自寅至戌一中而已自有米如玉銳鹽類虎形雲夢
之芹遼東之藻十斤之梨千樹之橘青筍紫薑固栗
霜棗適口克腸無索弗獲八功德水並入法流四王
俱至偕讓弘道同志爲友豈不盛歟蕭繹疏

答湘東王書

梁簡文帝

十八日晚於華林閣外省中得弟九月一日書甚慰
懸想秋節淒清比如常也州事多少無足疲勞濠梁
之氣不異恒日差盡怡悅時有樂事遊士文賓比得
談賞終宴追隨何如近日注漢功夫轉有次第思見
此書有甚飢怒吾蒙受菩薩禁戒造預大士此十二
日便於東城私懺十七日日早入寶雲壁門照日銅
龍吐霧紅泉含影青蓮吐芳法侶成羣金山滿座身
心快樂得未曾有昨日平等寺法會中後無礙受持
天儀臨席睟容親證拜伏雖多疲勞頓遣剃頂之時
此心特至心口自謀併欲剪落無疑馬援遣蝨之談

不辭應氏赤壺之諷僧璉典議不異昔日竟日問璉
殊均子路探鉤取名名曰因理皇情印可今便奉行
昨晡後方還所住徐摛庾吾羌恒日夕鏡遠在直時
來左右但不得個儻殊異盤下之時稍習節文欲避
酒泉之職尹王相去旣爾彌伸款對臨汝侯比多屬
疾來宮小稀其間信使差得其簡擘兼詹事疎爲洗
馬時伸話言數語論辯句之侯東撫復成離闕衡山
九疑尋應引邁臨歧有歎望水興嗟但吾自至都已
來意志忽怳雖開口而笑不得真樂不復飲酒垂二
十旬次公醒狂自成無理知者艾數信述吾經過適

憶途遵江夏路出西浮日月易來已涉秋暮而韋述
有長沮之弊必笑之災術異葛仙形均荀序弟復資
其糧餼特爲經營轉禍爲福事均北叟分別已來每
增慨憶歎因月積想逐時旋每有西郵事同撫胫相
見之期未知何日瞻言玉嶺靜對金關懷勞之深未
常弭歇善自保惜及此不多綱疏

與梁朝士書

釋曇瑗

光宅寺曇瑗白竊惟至人垂誨各赴機權故外設約
事三千內陳律儀八萬誠復楷訓異門無非懲惡孔
定刑辟以詰姦宄釋敷羯磨用擯違法二聖分教別

有司存頃見僧尼有事每越訟公府且內外殊揆科
例不同或內律爲輕外制成重或內法爲重外網更
輕凡情僂俛肆其阿便若苟欲利已則捨內重而附
外輕若在陷他則棄內輕而依外重非唯穢黷時宰
便爲頓乖理制幸屬明令公匡弼社稷和燮陰陽舟
楫大乘柱石三寶遐邇向風白黑兼慶貧道忝居僧
例頗曾採習毗尼累獲僧曹送事訪律詳決尋佛具
切戒國有憲章絰僧家諍執未審依何折斷謹致往
牒佇奉還旨庶成約法永用遵模釋曇瑗呈

與瑗律師書

釋惠津

惠津和南竊聞尋師萬日以禮見知而津伏奉未淹
過蒙優接昔鄒陽上書乃可引爲上客宋玉陳賦則
一賜以良田且復康會來吳才堪師表摩騰入漢行
合律儀者哉故知道寄人弘德不孤立儔今訪古並
非其例豈可虛佩寵靈坐安隆渥便是名踰分外譽
超身表但法輪初啓請業者如雲非直四海同風天
下慕義遂令負笈之徒排肩自遠歸仁之士繼踵來
儀華陰成市曾何足云舉袂如帷豈得獨高前代况
乃闡禪定之初門開智慧之燈炬信實傾河倒海宣
說不窮先進者陷於金城後生者摧其利齒可號熏

修戒善能令十地瓔珞守持身行則使八正莊嚴允
穆聖凡叶和幽顯加有懷鉛握錐之好聚螢流麥之
勤或剖蚌求珠開河出寶而惠津一介無取內外靡
聞學謝懸鍾言慚散粉同斯曲木空廁直蘭類此兼
葭謬參玉樹乃知滄溟汪濊不待毫滴之珠華嶽穹
崇寧俟遊塵之壞譬茲秋鳳如彼春林墜獨葉不預
百枝落一毛何關六翮正言身名仰委觸途憑累區
區寸誠喻如皎日不意三邊有務四郊多壘致使虧
贊講筵請益成廢及言悲鯁寧可具披所冀難靜障
除更敦諮受不任戀結行遣祇承惠津和南

答淨律師書

釋曇瑗

信來枉告良用撫然余學慚技癢人非准的中間雖
曾講授不異管內闚天豈足作範後昆踵武前哲蓋
身疾弗瘳門人引去一師盛業廢而莫傳五十之年
忽焉將至長夜永懷惆悵何已每有好事者日相請
逼遂以罷老復成自勵如法師數子本出名家洛下
奇才當今利齒必欲探覈論部任持律藏方爲美器
日見絕塵復有海表奇僧聚中開士皆學無常師不
遠而至訪道質疑足稱一時之樂不意胡兵犯蹕虜
馬飲江塔廟焚如義徒道殫卽日京華故老倚席不

談乃復爰訪幽阿令其訓導久廢無次何以誨人故
乃荆棘生乎口中雌黃謬於舌杪矣煎水求冰未足
爲喻佇能近顧方陳寸款瑗白

天台山顓禪師所受菩薩戒文 隋煬帝

弟子基承積善生長皇家庭訓早趨胎教夙漸福履
攸臻妙機須悟恥崎嶇於小徑希優遊於大乘笑息
止於化城誓舟航於彼岸開士萬行戒善爲先菩薩
十受專持最上喻造宮室先必基址徒架虛空終不
能成孔老釋門咸資鎔鑄不有軌儀孰將安仰誠復
能仁奉爲和尚文殊冥作闍黎而必藉人師顯傳聖

授自近之遠感而遂通波崙罄髓於無竭善財亾身
於法界經有明文非徒臆說深信佛語幸遵時導禪
師佛法龍象戒珠圓淨定水清澄因靜發慧安無礙
辯先物後已謙挹成風名稱遠聞衆所知識弟子所
以虔誠遙注命檝遠迎每慮緣差值諸留難亦旣至
止心路豁然及披雲霧卽銷煩惱以年月日於揚州
金城設千僧會敬受菩薩戒戒名爲孝亦名制止方
便智度歸宗奉極作大莊嚴同如來慈普諸佛愛等
視四生猶如一子云旣受戒已便舉法名詔帝爲
總持菩薩也帝頂受已白曰大師禪慧內融導之以

法澤可奉名爲智者斯同梁高舉約法師之徽號矣
統略淨住子淨行法門序
釋道宣

夫淨住之來其流尚矣祖述法王開化導達之方統
引羣生履信成濟之務也是以正法存沒畢乘信毀
之功神用昏明終藉惰勤之力竊聞輪王興運肇於
有劫之初法主膺期開於濁惑之始其故何耶良有
以也諒由淳薄結於夙心故使機感隆於視聽自教
流震土六百餘年道俗崇仰其蹤可悉至於知機明
略弘贊被時垂清範於遺黎導成規於得信者斯文
在斯可宗鏡矣昔南齊司徒竟陵王文宣公蕭子良

者崇仰釋宗深達至教注釋經論鈔略詞理掩邪道
而闢正津弘一乘而揚士衆世稱筆海時號智山或
通夢於獨尊謚天王之嘉稱或冥授於經唄傳神度
之英規其德難詳輒從蓋闕以齊永明八年感夢東
方普光世界天王如來樹立淨住淨行法門因其開
衍言淨住者卽布薩之翻名布薩天言淨住人語或
云增進亦稱長養通道及俗俱稟修行所謂淨身口
意如戒而住故曰淨住也子者紹繼爲義以三歸七
衆制御情塵善根增長紹續佛種故曰淨住子也言
淨行法門者以諸業淨所以化行於世了諸法門故

有性相差別始於懷鈔終於絕筆凡經七旬兩表都
了遂開筵廣第盛集英髦躬處元座談敘宗致十衆
雲合若赴華陰之墟四部激揚同謁靈山之會咸曰
聞所未聞清心傾耳故江表通德體道乘權綜而習
之用開靈府陳平隋統被及關河傳度不虧備于藏
部後進學寡識昧前修曾不披尋任情抑斷號曰僞
經相從捐擲斯徒衆矣可爲悲夫余以暇景試括檢
之文寔菁華理存信本矣故知今所學教全是師心
心何可師一至如此是以智度論云佛滅度後凡所
製述弘贊佛經者並號阿毗達磨卽十二部經之所

攝也聖教明訣理絕凡謀但以初學惑昧未能瞻及
輒又隱括略成一卷撮梗概之貞明摘扶疎之茂美
足以啓初心之跬步標後銳之前蹤又圖而讚之廣
于寺壁庶使愚智齊曉識信牢強萬載之道遐開七
衆之基成立敬而信者是稱淨行之人宗而行之不
亾淨住之目貽厥諸友知其意焉

淨住子淨行法門

三十一條
并王融頌

蕭子良

皇覺辨德門一

九十六種道而佛道爲最上勝者非無其義夫立名
所以表德非德無以顯名有名未必具德有德名非

虛唱是知名有真假德有虛實豈可道俗混同竊名
假實而不辨析者乎今觀殊教異軌分衢舛迹未嘗
不有其名而闕其德不無其稱而求其用是知有名
無德者外道也有德有名者佛道也譬若濟海託舟
踐途寄足故經云直心是道場無虛假故發行是道
場能辦事故如是四弘六度俱稱道場藉如此之勝
因獲若斯之妙果所以解脫去其累般若窮其照相
好表其容法身顯其德語其至仁則三念齊想言其
自在則無畏獨步談其累功則十力爲用仰其妙極
則不共之法神通方便無量法門洞達三世了照萬

有卓然明顯英聖超羣故號如來十號具足旣自覺
於生歿昏夜又復起於未覺悟者斯可謂有其名德
無不包具其美德無不備故知形端則影直聲調則
響和未見貌醜鑿鏡有悅目之華體矧照水發溢羣
之觀書云不登山無以知天之高不測水無以知地
之厚也凡如斯之異學皆漏於佛之大道矣故經云
世間亦有常樂我淨出世亦有常樂我淨世間者有
名無義出世者有名有義故六師結誓經問佛名德
佛答云最正覺自得不染一切法一切智無畏自然
無師保至獨無等倫自獲於正道如來天人尊一切

智無畏今各既知至德有歸邪正異趣善惡分逕凡
聖路隔幸得信因果悟非常順智流入正道諸聖並
能悼川上之不追悟交臂之潛往病生滅之無窮慕
我淨之恒樂凡我咸已仰風餐化割愛辭榮豈得不
凜然增到形命相競者乎故當清和其性哀愍有形
等心存濟以法惠施不犯不取有求不逆常志大乘
內外相副是名具足清淨度門

頌曰紫實昧朱狂斯濫哲舛逕揚鑣分源競柵麗景
或幽澄舒每缺水激波生煙深火滅情端徒總理向
空徹不有明心誰驅聖轍

開物歸信門二

如來愍念衆生愛同一子何嘗不以善權方便弘濟
益之津乎所以垂形丈六表現靈儀隨方應感法身
匪一及其金容託體相好莊嚴顯發衆生欣樂瞻覩
行則大千震動衆魔懾伏住則洞達諸定外道歸化
坐則演示方等釋梵諮仰臥則開一實道三乘稟德
言則三塗靜苦笑則四生受樂聞聲者證道見形者
解脫當此之時豈不盛哉今者雖稟精靈昏惑障重
進不覩分衛國城退不聞八音辯說將由罪業深厚
煩惱牢固非唯恐不見前佛後佛來聖近賢深憂惡

道無由可絕發如此意實有切情之悲運如是想不覺痛心之苦豈容順默使流晏安苦海沈淪沸火而不自拔者乎當須慷慨凜厲挫情折意生增上心懺悔滅罪去諸塵累乃可歸信自不堅強其志亾身捨命捍勞忍苦銜悲惻愴者將恐煩惱熾火無由而滅無明重闇開了末期譬如牢獄重囚具嬰衆苦抱長枷牢大械帶金鉗負鐵鎖捶撲其軀膿瘡穢爛周遍形骸臭惡纏巾而欲以此狀求見國主貴臣雖復一心無怠懇誠嘉到恐升高殿踐王筵亦無由而果假令愍念欲覩爲難何以故以其具諸罪惡不離苦具

故若去枷脫鎖洗垢嚴服王不我礙自然而現今欲歸信亦復如斯將見如來相好光明者先當淨身口意洗除心垢六塵愛染永滅不起十惡重障淨盡無餘業累既除表裏俱淨方可運明想於迦維標清心於寶刹去諸塵勞入歸信門必然仰覩法身無礙如囚脫枷鎖自然見於王我今除煩惱亦必覩諸佛若不如是雖復慇懃倍切直恐障礙難通豈可不五體投地如太山崩一心歸信無復疑想奉爲至尊皇太子七廟聖靈龍神八部一切劇苦衆生敬禮十方一切三世諸佛求哀懺悔既悔已後常行柔軟調和心

堪受心不放逸心寂滅心真正心不雜心無貪恡心
勝心大心慈悲安樂心善歡喜心度一切心守護衆
生心無我所心如來心發如是等廣勝妙心專求多
聞修離欲定奉戒清淨念報恩德常懷悅豫不捨衆
生

頌曰生浮命舛識罔情違業雲結影慧日潛暉透迤
修道極夜無歸登山小魯泛海難沂參珉見璧辨礫
知璣迷其未遠匪正何依

滌除三業門三

身口意三禍患之首故經云有身則苦生無身則苦

滅既知其患苦則應挫而滅之滅苦之要莫過懺悔
懺悔之法先當潔其心靜其慮端其形整其貌恭其
身肅其容內懷慚愧鄙恥外發書云禮無不敬敖不
可長又曰過而能改是謂無過經云於一切衆生敬
之如親想各自省其過然後懺悔衆等從無始世界
已來至於此生由於身意造諸苦業並緣愚癡多違
至教遂乃憍慢懈怠形用不恭眠坐放逸行動輕傲
或入出僧坊登上堂殿禮拜旋遶形不卑恭或於父
母師長上中下座善友知識前服用不端動止乖法
非禮而觀用違體制或盜三寶財及親屬物一切他

有抄掠強奪欺誑增減非分相陵或姪佚恣縱非時
非處因隔禽獸不避親族或造五逆水火焚澆攻略
坑陷加毒無罪或剗剗則考掠斫射傷毀斬截殘
害剝裂屠割炮燒煮炙燔淪諸如此罪或爲姪欲或
爲財利或爲慳貪或爲癡我無慚賢愚不愧聖達今
思此過若影隨形怖懼慚愧悲惻懺悔痛苦懺悔已
有相加害者從今已去爲真善友生生相向以法示
誨願十方佛特加攝念悔身業障永更不造次懺口
業此是患苦之門禍累之始書曰一言可以興邦一
言可以喪國又曰言行君子之樞機樞機一發榮辱

之主經云不得離間惡口妄言綺語諂曲華詞構扇
狡亂故知有言之患招報實重廣如自愛經彰斯業
相又如經云失命因緣尚不妄語何況戲笑構扇是
非常以直心懺悔口業次懺意業意爲身口之本罪
福之門書云檢七情務九思思無邪動必正七情者
喜怒憂懼憎愛惡欲者也九思者視思明聽思聰色
思溫貌思恭言思忠事思敬疑思問忿思難見利思
義此皆所以洗除習懷去邪務正經云不得貪欲瞋
恚愚癡邪見故知萬惡川流事由心造何以知其然
若瞥緣心起故口發惡言言由意顯便行重罪今欲

緘其言而正其身者未若先挫其心而次折其意故
經云制之一處無事不辦既心會於道身過不遏而
止意順於理口失不防而滅然身口業麤易可抑絕
意造細微難可壑盡廣如諸經說其相狀

頌曰樂由生滅患以身全業資意造事假言空利衰
畢倚榮辱茲纏燕驥匪躡周錯徒鑄惑端夙緒愛境
旌懸不勤一至何階四禪

修理六根門四

經云罪無定相隨因緣造既是因緣而生今亦隨因
緣而滅前已懺其重惡則三業俱明又欲莊嚴容體

則須六根清淨同知心之驅役諸識亦猶君之總策
諸臣故書云君人者懍乎如朽索之御六馬言其畏
敬御物不及於亾驗之此事曉然俱了但以萬境森
然感發內外更相因倚構接心識故經云心王若正
則六臣不邪須各慚愧制馭根識如法句經心意品
說昔有道人河邊學道但念六塵曾無寧息龜從河
出水狗將噉龜龜縮頭尾四脚藏於甲中不能得便
狗去還出便得入水道人因悟我不及龜放恣六情
不知歿至輪轉五道皆由意根故須總明六根罪業
我從無始已來眼根因緣隨逐諸色見勝美之事不

能修學見不善之業隨順履行獲此雙眼其淨甚少
惟見無慚無恥之色不見賢聖神通方便作用之色
雖有雙目與盲不異是大可恥一也我從無始已來
耳根因緣隨逐外聲聞說正善信忠勸美不能修學
反生憤結聞邪惡事歡然順行緣此因故唯聞一切
不善音聲不聞清淨正法之聲十方諸佛常說妙法
我今不聞生聾不異是大可恥二也我從無始已來
鼻根因緣若聞正教戒德妙香初不樂聞反生妨礙
聞諸惡欲邪媚之香深心耽著由此業故墮大地獄
生在邊地不聞賢聖五分之香不聞三乘四攝等香

使我輪迴常與善隔是大可恥三也我從無始已來
舌根因緣造過特多貪著厚味不淨說法致此罪緣
常淪生歿是大可恥四也我從無始已來身根因緣
多造衆罪自重輕他增長癡愛由此業故得下賤報
於佛勝緣無由攀附是大可恥五也我從無始已來
意根因緣備造衆惡至人經教拔苦出要心不希行
更生違拒乃學異論規圖罪種致無正信求名求利
增長我見乖僻尤重貽歿之時方悔虛過此大可恥
六也

頌曰傾都麗佳繞梁之曲肥馬輕裘蕙肴芳醪晦黑

滋生昏聩競欲貌蕩魂浮身甘意觸靈龜攝根睛葵
衛足蟲草或虞人如不勛

生老病死門五

尋夫遠劫已來三業所纏六根所惑染愛潤業沈沒
迄今生老病死實爲大苦故經云一身死壞復受一
身生死無數盡天下草木斬以爲籌計吾故身不能
數矣所以達人與厭高外界繫之表愚夫貪生恒淪
死生之獄故須識過可得長辭如胞胎經云衆生受
胎冥冥漠漠狀若浮塵在胎十月四十二變識微苦
毒楚痛難忍臭處迫近劇於牢獄飢渴寒熱過於餓

鬼母飽急塞母飢悶絕食冷如冰食熱如火飲多如
漂大海行急如墮險谷坐久如土鎮竿立久如懸廟
屋下熏上壓無時不苦及將欲生倍復艱難如赤身
赴刃叫聲震烈雖具此苦復多不全若一日百日一
月十月或在胞胎墮落或出生母子喪命當思此生
實是大苦次思老苦經云年耆相熟形變色衰坐起
苦極餘命無幾涅槃經云譬如燈炷唯賴膏油膏油
旣盡光炷非久人亦如是唯賴壯膏壯膏旣盡衰老
之炷何得久住又如折軸無所復用如遭霜花人不
欲視又經云是日已過命亦隨滅如少水魚斯有何

樂當思此老復爲大苦次思病苦皆由風寒冷熱食
飲不節四時變改則水石垂扶況此假合之體危脆
之形望免四大不虧百一無惱豈可得也及至苦患
切身心煩愁塞求生不差求死不絕痛楚百端窮憂
自結屎尿臭處妻子爲之改容形骸不攝傍人爲之
變色況單身寄病誰肯提携故經云慈父孝子至病
死時不能相救此至言也實爲大苦次思死苦經云
死者盡也氣絕神逝形體蕭索人物一統無生不終
又經云去處懸遠而無伴侶無所破壞見者愁毒等
經又云獨生獨死身自當之幽冥幽冥會見無期是

以聖人以身爲患豈復以死更受生乎往來五道勞
我精神誓斷貪源絕其生本是故死苦實由此身如
來出家立言此意

頌曰穠華易遷繁蕉不實星髮鮐肌鄰光愒日二豎
潛言十空空術生之往矣高松蕭瑟卽化翻靈從緣
墜質噬臍有譏嗟然何汨

剋責身心門六

身爲苦本自所造集於生死中復增惡業不能改悔
隨順佛語是故特須深自剋責經云見人之過口不
得言己身有惡則應發露書云聞人之過如聞父母

之名耳可得聞口不得言又云君子顯其過經云讚人之善不言已美書云君子揚人之美不伐其善經云恕已可爲譬勿殺勿行杖書云已所不欲勿施於人今以經書交映內外之教其本均同正是音殊名異若使理乖義越者則不容有此同致所以稱內外者本非形分但以心表爲言也經云佛爲衆生說法斷除闇惑猶如良醫隨疾授藥書云天道無親唯仁是與若出家之人觀空無常厭離生死行出世法是則爲內乖此爲外在家之人歸崇三寶持戒修善奉行禮義是則爲內乖此爲外今內外道俗共知內美

之稱由心外惡之名在行豈得不捨外惡勤修內善若欲修行先自剋責當知求進是假名退檢是實法欲涉千里者必裹糧衛足而致也欲升彼岸者必聚智糧具戒足而登也所以能果者實由退檢覺察校試輕重故能却斷無明退截老死愚闇滅則慧光發四相遷則戒德顯故知廉退者進之兆也貪進者退之萌也夫求而獲者虛則實愛情深故有傾危墮墜之苦此外道之法也退而獲者實則意無深戀故得常安涅槃之樂斯佛道之法也今者但應退檢不及以自責躬若志求進必損我傷物退檢檢失則彼我

兼利當知剋責心口是八正之路檢察身行是解脫之蹤是故如上善自剋責則無善而不歸也

頌曰瞻彼進德莫敢惑遑顧咨小智徒以太康豈無通術跋此榛荒雖有重離迹照螢光循情內負撫事外傷層羅一舉空念高翔

檢覆三業門七

剋責之情猶昧審的之旨未彰故以事檢心校所修習既知不及彌增悚慙何謂檢校檢我此身從旦至中從中至暮從暮至夜從夜至曉乃至一時一刻一念一頃有幾心幾行幾善幾惡幾心欲摧滅煩惱幾

心欲降伏魔怨幾心念三寶四諦幾心念苦空無常幾心念報父母恩慈幾心願代衆生受苦幾心發念菩薩道業幾心欲布施持戒幾心欲忍辱精進幾心欲禪寂顯慧幾心欲慈濟五道幾心欲勸勵行所難行幾心欲超求辨所難辨幾心欲忍苦建立佛法幾心欲作佛化度羣生上已檢心次復檢口如上時刻從旦已來已得演說幾句深義已得披讀幾卷經典已得理誦幾許文字已得幾過歎佛功德已得幾過稱菩薩行已得幾過稱讚隨喜已得幾過迴向發願次復檢身如上時刻已得幾過屈身禮佛幾拜已得

幾過屈身禮法禮僧已得幾過執勞掃塔塗地已得
幾過燒香散華然燈已得幾過拂除塵垢正列供具
已得幾過懸幡表刹合掌供養已得幾過遶佛恭敬
幾十百市如是檢察會理甚少違道極多白淨之業
裁不足言煩惱重障森然滿目闇礙轉積解脫何由
如上檢察自救無功何有時間議人善惡故須三業
自相訓責知我所作幾善幾惡
頌曰渾風緬沒旅俗膠加競文內疾誰覩心瑕再惟
情反三省身華貴危窮濫貧懾豪奢邇迴六蔽紛綸
七邪不圖厥始逸馬難豎

訶詰四大門八

四大謂地水火風也

上已檢校所行多諸廢惰由此四大招致懈怠是故
訶詰令其覺悟夫三界遐曠六道繁滋莫不依因四
大相資成體聚則爲身散則歸空然風火性殊地水
質異各稱其分皆欲求適求適非一所以乖忤易動
故一大不調四大俱疾乍增乍損痾疹續生風輕而
地重水冷而火熱互相煎惱無時得安經喻四虵信
哉可患又此四大無慚無恥無恩無義我今恐其不
安所以資給所須然彼四大初無愧感何以知之至
如悲風霜殞嚴冬雪零便須綿纈衣裘臥褥溫室若

季夏鬱蒸焯赫炎烈復須輕絺廣室風扇牙簟春秋
改節氣候清爽復須輕軟服御乃至食則甘肥珍餚
克滿飲則瓜果溫漿冷水隨時資給安苦求樂此皆
四大所須而我供贍未曾拒逆而此四大求索無慚
不知有無有則克給不厭無則恐迫令得如飢須食
不可暫闕脫致乖違內愁外戰增發火大不知我艱
辛不恕我空乏唯欲貪求無有休息是名無慚云何
無恥汝之所須無窮我隨給汝不少雖然當受初無
愧容我既役智盡謀以相資贍而汝初無矜念於我
於少日中不須衣食云何無恩今既得我如此供給

未嘗爲我造作善事獲我衣食飽暖怡懌反更思念
作一切惡少時禪誦禮拜卽生懈怠云何無義此四
大身不可期懷不可委信我今爲汝種種供須反復
橫起種種愛著驅逼於我行殺盜姪我既愚癡不能
制革還相隨順生諸疾病或遭王法牢獄鞭杖爲汝
所招我既嬰苦汝亦無利猶復不知更求更索從今
日去不復隨汝流轉老病生歿大海汝當隨我行道
作諸善業方可給汝隨病衣食趣得支身以除飢渴
汝當善自驅策令我早得五分法身常化遊行自在
無礙

頌曰迅矣百齡綿茲六入出沒昏疑興居愛習矻矻
予求營營爾給匪德日歸惟殃斯集貪人敗類無厭
自及昭回不希玄墟何泣

出家順善門九

上已檢校所行知乖道實遠剋責自咎則進趣有途
前雖道俗總論混知其過然在家罪重出家罪輕但
出家之人行業階差生熟難辨然阡陌而觀亦粗見
其迹今出家者未登聖境而期望之人恒引聖責凡
良由大教勝遠尊之者責重法律精微信之者望深
何以知然今欲見雅形妙相之體當覩儀容端麗之

人欲觀仁義盛德之風當尋有禮有義之行何常見
衆多之口競譏棄諸外道正以不足及言所以息議
在於衆僧動爲論端實由我法清勝嫉之者多我法
高遠毀之者衆書云城高則衝生道尊則魔盛今乍
聞詰誚之言乃足驚怪就理而尋非無義而發試爲
檢其所修比其所習福之深濃罪之厚薄可加意察
之夫父母是孝戀難遣而能辭親妻子恩染難棄而
能割愛勢位物情所競而能棄榮飢苦是人所難忍
而能節食滋味是人所貪嗜而甘厭蔬澀翹勤是人
所厭怠而能精苦七珍是人所恡惜而能捨離錢帛

是人所蓄聚而能棄散奴僮是人所資待而自給不
使五色是人所欣覩而棄之不顧八音是人所競聞
而絕之不聽飾玩細滑人所保著而能精麤無礙安
身養體人所共同而能忘形捨命眠臥是人所不免
而晝夜不寢爲業恣口朋遊人所恒習而處靜自檢
白衣飲饌不知紀極而進食如毒白衣日夜無所不
甘而已限以畧刻虛腹白衣則華屋媿偶而已塚間
離著又行住坐臥如是法禮拜圍遶如是法讀誦講
說如是法食飲便利如是法受供行施如是法修道
習行如是法略說如上無非有法數則三千威儀廣

則說不可盡餘如出家功德經說

頌曰澡身浴德晦迹埋名將安寶地誰留化城道場
曠謚禪逕閒清風瓢弗響震轍徒驚嘯傲焉慮脫落
何管長捐有結永真無生

廣弘明集卷之二十七上

廣弘明集卷第二十七下

唐釋道宣撰

在家從惡門十

俗士每言談之次或問白衣歸向何法無不答云釋氏純臣縱復實心錯背亦羞言其乖各所以爾者寔由大法精勝不欲與善相違故也既言其信當事與言同若言事相反者便是矯偽諛側佞邪媚天下所驚嗟四海所駭歎若欲真實期於三世者見沙門之過當知凡劣形服雖異喜怒何殊便思其理可崇本不在人何得以鄙恠之行用廢大道乎且其積習

勝業已積熙連沙喻可不深思今諸士女試自檢察
實自多過瞋恚不避尊貴惡罵無復高卑貪求不計
毀辱慳吝不知禮節姪欲不擇禽獸黜退不避親族
加以憍慢放逸貢高懟恨諍訟邪命詐現異相以利
求利惡求多求無有恭敬不隨教誨身見有見及以
無見未嘗省退以禮自制一何苦哉唯恐我不勝人
人莫及我經說起慢此業熾盛燒滅宿世所種善根
又云爲惡雖少後苦無邊如毒在身終爲重患諸俗
人等唯欲營生不知顧歿然生不可保歿必奄至尋
此危命非朝則夕俄頃之間兇變無常如佛爲愚癡

富老公說偈汲汲憂子財非我何所有愚人多預慮
莫知當來變廣文如彼何得不思貪求積聚終必散
失身歿名滅唯業相隨又觀女人所起患毒倍於男
子經云女人甚深惡難與爲因緣恩愛一縛著牽人
入罪門女人有何好但是諸不淨何不審諦觀爲此
發狂亂郁伽長者經云在家修道當觀女人生厭離
想非常久想不淨潔想臭穢惡想羅刹惡鬼恒噉人
想貪色難飽無止足想惡知識妨淨行想三惡道增
憂苦不斷目面脣口感人之具人爲所惑破家滅國
殺親害子眾禍之本皆由女色

頌曰石磨則磷玉生雖堅維居必徙豈曰能賢冰開
春日蘭敗秋年教隨類反習乃情遷命符三漏生偕
十纏茲焉遂往憂畏方延

沈冥地獄門十一

萬法雖差功用不一至於明昧相形唯善惡二途而
已語善則人天勝果差別於目驗述惡則三途劇苦
皎然而非虛而愚惑之夫好起疑異多言人天是妄
造地獄非實說以不覩故便不知推因以測果由不
了故復不知驗果以尋因既因果未分空扇是非疑
途亂起明在何日無論未來其事難了但以卽今善

惡是驗冥漠非妄夫有形則影現有聲則響應未見
形存而影滅聲續而響垂故知善惡相資亦復如是
幸各明信無厝疑心何謂地獄經中廣說此洲地下
八大地獄最下阿鼻四萬由旬鐵城四周表裏火徹
銅狗黑虵哮吼嚼咋甚可怖畏諸小獄者散在鐵圍
山間海渚空野衆處備受寒熱難可具說獄各有主
牛頭阿傍其性殘虐無一慈忍見受苦者唯憂不苦
唯憂不毒或問獄卒衆生受苦甚可憐愍而汝無慈
常懷毒害獄卒答曰諸受苦者由是不孝父母謗佛
法僧罵辱親疎毀陷一切破壞和合瞋恚殺害貪姪

欺詐邪命邪求及以邪見憍慢懈怠放逸怨恨迷沒
聲色耽著酒食犯所受戒不知慚愧具足惡業來此
受苦受苦既畢恒加諫喻此是惡處今已得脫勿復
重來然此衆生初無改悔今日得出俄頃復來勞我
形力加毒於彼今觀此輩既不修善往趣泥洹則是
無知不識避苦所以倍痛苦之何由得生慈忍又經
云有十惡業殺生偷盜能令衆生墮於地獄畜生餓
鬼無量劫數乃得爲人還受短命貧窮等報又感外
報棘刺沙礫水草少味不如意等且身口意此三發
業之始自作教人見作隨喜此三成業之由現報生

報後報此三感業之所故論云三三合九種從三煩
惱生然前九位業通善惡受三塗報唯在三毒是故
行人先須觀彼於此人身可有出理

頌曰冥津殊復曉高聽亦能卑陰牆雖兩密幽夜有
四知炎山翻烈火冰澗而寒澌羅城振雲幕鋒樹鬱
霜枝茹荼非云苦集木豈稱危求仁曾已得長歎欲
何爲

出家懷道門十二

自大聖已還性體未圓三相所遷四山作固所以如
來智周域外尚假苦切之言令諸有生得入律行今

居在凡愚善惡雜糅何能免點累之愆愛染之失若
聞所說當深歎悼何時免離若斯之過不得內懷驚
疑增其忿憾也然則起忿之來誠由著我如經所說
執我見者生歿大患第一破戒且舉一我無人不患
自非正聚誰不弊之出家本意爲滅此惑故諸行者
常須遮制積功不已漸得出有迷此不修還同無始
徒在僧倫更招苦業今聞出家之美不得便言無惡
又聞俗人之惡不可便言無善故通述之宜各警策
夫出家者猶信故入道也當去愛著順佛語則出世
之行成也若於行有虧則非謂之信也內旣無信則

翦落納衣瓶鉢等於身無用略引數條不得自怠已
去憤鬧得空閒已離俗愛無攀緣已出馳動入寂定
已離染著得無礙已捨苦境得無惱已離妻子無纏
縛已棄飾好厭華侈已絕聲色滅貪求已斷榮辱去
我見已向八正趣道門已披弘誓忍辱鎧已服解脫
涅槃衣已望畢竟空寂舍已登慈悲喜捨堂已見迴
向之大利已聽多聞自覺音佛見出家之利樂如此
所以勸獎誠勵修學故經云蓋聞沙門之爲道也捨
家妻子捐棄愛欲斷絕六情守戒無爲其清淨一心
者則萬邪滅矣一心之道者聲色不能汙榮位不能

動免離憂苦存亾自在塊然獨立捨五慳除兩穢二
堅縛二障法二種垢二雨雹二癰瘡二燒法二種病
四破戒者一謂三業不淨二謂聞空怖畏三謂不爲
泥洹四謂貪著我見又如經說菩薩修行先除四失
謂捨欺誑重報恩決嫌疑滅諂心如是備行諸度妙
行清淨廣大安住寂靜

頌曰韞石諒非真飾瓶信爲假竊服臯門上濫吹溜
軒下鳳祀徒驚心騶文終好野實相豈或照浮榮未
能捨迹殊冠冕客事襲驅馳者已矣歇鄭聲無然亂
周雅

在家懷善門十三

前已聞其惡深自鄙悼今顯其善悅以進道何以知
之自非貪欲情厚染愛性深富貴意重勢利心濃者
則不容安處累縛黑闇所纏故知在家者衆患之本
矣故使室家妻子宗親眷屬周旋來往朋友遊處奉
上接下皆須將意意不獨往其應筐篚筐之用非求
不至旣馳求事廣財念無窮惟念多蓄不顧無常擁
積腐壞靡知分散是爲欲不慳貪便不能得旣眷屬
纏繞百心不同不加鞭罰則爲惡者衆雖曰止惡要
由意瞋起是爲欲不瞋恚亦不能得爲此資生校計

馳求萬方以利縈心不知患害水火盜賊艱苦備經
或夭身命殘殺無辜宴集歡樂非此不濟起貪癡心
謂我加爾飲噉之後暢快莫思是爲欲不起癡而不
能得當知白衣與善相違故曰所作之事與地獄對
門又云居處如牢獄妻子如枷鎖財物如重擔親戚
如怨家而今在窮苦之地繫縛憂厄艱辛纏累備諸
苦惱不親三寶不近正法窮迷闇障劇苦之內而能
一日一夜守持清禁六時行道兼修六齋年三長齋
或持一戒二戒三戒乃至五戒八戒十戒菜蔬節味
檢身口意又率妻子內外眷屬迴向崇善建菩提因

或撤父母之供妻子之分財貨衣服甘珍餽果窮其
所有敬供精潔合室營奉晨昏翹注或爲疾病患危
急縣官牢獄或親族崩亾祈福魂路或生善滅罪始
發信心崇仰沙門在聖無別由其隨順佛正教故所
以順佛語故出離生歿若違佛語必墮惡道是故常
應堅發正願願受化生自在飛行一切佛刹隨所感
見應接羣生學佛威儀入如來室著如來衣坐如來
座巧便大慧開悟解脫於諸法中究竟無障盡虛空
際大誓莊嚴

頌曰處塵貴不染被褐重懷珠美玉曜幽石曾蘭挺

叢芻四氏不爲侶三界豈能渝諒茲親愛染寧以財
利拘煩流捨智寶榛路坦夷途萬物竟何匹烈火樹
紅芙

三界內苦門十四

夫三界牢獄四圍輪轉在家出家未斷我倒無得免
者旣爲生死所纏身心勞累遷變無窮無非是苦故
經云三界皆苦何可樂者而衆生常惑謂言世間是
常是樂出世樂因無常是苦何其沈迷頓此顛倒纔
驗刺身卽覺苦受何得云樂略引數條證知唯苦苦若
謂飲食爲樂者則應多所餐進身和心悅何意小乖

分度便成疹患若謂衣服爲樂者則應春夏一服愛
心無厭何意寒暑異服明不甘樂所以苦本若謂室
宇爲樂者何意不常一處旣致馳動明知避苦若謂
妻子眷屬爲樂者則應長相歌笑何意俄爾無常悲
號哽噎當知眷屬實是苦本若謂妙色以爲樂者則
應長悅心目永慰形骸何意須臾顏貌變改髮白面
黑傷痛少年華美之豔故知此色本自是苦不是外
來若謂好聲以爲樂者則應絲竹繁會觀聽無厭何
意小久便致昏倦耳不樂聞當知是苦若謂酣酒以
爲樂者則應適意遣憂長無惱患何故神昏心悶骨

節慘痛或因此事鞭杖鎖繫喪身天命破家亾國受苦無量若謂朋遊爲樂者則應終日遊散不知厭極何意每一登臨少時便倦後更相攜無復行意若謂姪佚爲樂者則應血氣剛強眼明神爽少而不老壯而不變何意恣情逞欲輒有疲困抽腦徹髓頭眩眼亂心驚氣迫筋骨緩縱口燥唇焦四肢振掉抽拔五藏由此天命當知姪佚實是苦本若謂榮位爲樂者則應始終不變無恥無辱何意黜陟之間憔悴立至已上諸條大舉而言然此六塵五情遊心之處無非是苦所以大聖覺察三界牢獄知苦不迷解脫生歿

頌曰心怨動紛遶情怡輒遷互歡愛一離遠傷憂坐
衰暮連幌結清陰高臺起風露腐毒緣芳旨天伐寔
修婢慾網必虧生繫且或全免眇眇夜何期悠悠終
肯悟

出三界外樂門十五

佛世尊說三界世間總是苦聚非唯一苦而已又是
無常無我不淨終歸於空出世之外則有常樂我淨
具八自在而衆生長迷妄謂爲樂一何可悲且說一
苦隨相有八何謂八苦所謂生苦老苦病苦歿苦愛
別離苦怨憎會苦求不得苦五盛陰苦於一苦中更

有諸苦故諸行人策勵行道節身口意翹勤匪懈羣
小無知謂之爲苦大聖圓照三達洞了知此小苦大
樂正因雖有勞頓所期者大非謂爲苦故引諸行相
用簡有心若捨身命憐愍衆生得佛金色身光明洞
徹行住坐臥震動大千相若禮拜父母師長賢聖得
佛頂相高明若不誑衆生讚揚其德得佛眉間毫相
若行慈愛仁救衆生得佛紺青螺髮相若以光燈供
養施人得佛項出日光相若以慈意視衆生者得佛
淨目上下眴相若絕滋味十善化人得佛四十齒齊
密相若說慈善志意堅強得佛四牙白淨相若絕口

四過得佛方頰車廣長舌相若行施平等得佛果時
七處合滿相若忍苦行決定無亂得佛師子臆相若
行正淨醫藥救人得佛身方正相若行慈仁不杖衆
生得佛修臂指長相若視地行不踐蟲命得佛行不
蹈地相若手扶接有苦衆生得佛手內外握相若行
四攝攝取衆生得佛手足網相若以淨心供養善人
得佛手足輪千輻理相若施衣服隱過蔽惡得佛陰
馬藏相若說除患法得佛鹿膺腸相若善莊嚴不
解衆生肢節得佛鉤鎖骨相若柔和順塔右遶從人
得佛右旋毛相若平治道去棘刺得佛一孔一毛相

若不服華綺沐浴於人得佛皮膚細軟相若掃塔除穢得佛身不受塵相若修萬行常願具足得佛曾土字相若捨國城妻子得佛淨土眷屬賢聖相若自節食上味施人得佛上味相若常讀誦不惡口加人得佛總持口香氣相若說法引接衆生得佛面無飢渴滿口光辯才相若持戒無缺得佛法身圓備相若在山間頭陀苦行得佛塵累都盡相若捨華堂幽林禪思衆生謂苦不能行之菩薩志意堅強所期者大不以爲苦故得自然宮殿七寶房舍早得成佛衆生猶自流轉生死海中豈非爲顛倒惑纏之所致也故當

勤加精進修行此行便出三界

頌曰端襟測煩海矯步寫埃氛三受猶絕雨八苦若浮雲輸心仰圓極罄質委方墳朝遊淨國侶暮集靈山羣燈祇開遠照香宇薦嘉薰俛首睇人俗信矣靜爲君

斷絕疑惑門十六

夫因果感應影響相生必然之道理無差舛而衆生業行不純善惡迭用以不純故報有精麤或貴或賤或美或惡其事迹匪一不了本行故致疑惑何者如精進奉戒應得長生子孫熾盛親族榮顯而返見身

命夭促門族衰殄屠害之人應嬰促壽眷屬殘滅而
反延年壽考宗強援廣清廉之行應招富足而見貧
苦貪盜之人應見困窘而覩豐饒此乃緣其福故現
世輕受如金剛般若云由持經故爲人輕賤是人先
世罪業應墮惡道以今輕賤故先世罪滅所以致有
此疑者由其無明惑故妄起顛倒不能解了三世業
相今略出數條世人惑事用以懲誡庶有識者識以
除疑智人以生爲苦所以不忍愚夫貪生以生爲樂
是一惑也智人以不生則不歿故云涅槃寂滅之樂
而愚夫惡歿不知遠死之方是二惑也智人以居家

爲苦譬之牢獄書云割情在於驕奢而愚夫染著以
爲榮樂是三惑也智人知妻子之累故比之枷鎖書
云割情在於所愛而愚夫以恩愛爲權欣是四惑也
智人以眷屬是繫縛之本放之如鷓而愚夫繫戀以
爲勝適是五惑也智人以榮利是自滅之筌書云割
情在於速達而愚夫不計讒害取貴是六惑也智人
以色聲香味爲苦本書云割情在於嗜欲而愚夫爲
之沈溺迷醉且列如前不容致惑是以智人當勤自
勉自生老病歿不離其身勿生疑惑一生空過今更
出之以顯疑相見布施者疾患早亾便起疑心慳慳

見持戒人過中不食致患懷疑自養見忍辱人檢心
攝形致患懷惱勸令開意見誦經人旦夕緣理致患
勸息見菜蔬人致患瘦弱勸噉肥美見坐禪者致患
勸臥聞語引進便稱本情懈怠自恣隨順流俗曾不
思量朝聞夕歿如救頭然何有情賴更習常俗以歿
自誓方曰有志

頌曰生塗非一理識緒固饒津徒駭東陵富空嗟北
郭貧國生曾已矣顏氏信爲仁逢尤昭往業習善會
茲身勤憂永夷泰晏安終苦辛令名且云重豈若樹
良因

十種慚愧門十七

既已同知在家男女之惡又見出家僧尼瑕累又聞
疑惑顛倒之門退自思省實可慚愧經云慚愧得具
足能滅闇障故又云慚如鐵鉤能制人非法若無慚
愧與諸禽獸無相異也涅槃經云有二白法能救衆
生一慚二愧慚者自不作惡愧者不教他作慚者內
自羞恥愧者發露向人有慚愧故則能恭敬父母師
長懷慚愧故罪則除滅顯相如此各須慚愧順清白
法事乃無量略舉十條以爲綱要第一慚愧諸佛如
來往昔欲令我等離苦獲安所以發心行菩提道忍

苦受辱令成法身常以正法爲我解說而我不能如
說修行第二慚愧父母哀哀父母生我劬勞長養教
詔常懷憂惕旣爲人子不順誨約反學凶強陵蔑貴
賤旣乖諍子上失令名深爲可愧第三慚愧諸子然
彼實能晨昏定省色養無虧而終貧煎無物賑給故
使諸子無由得立又闕教導使子愚昏實爲可愧第
四慚愧師僧然我父母生育訓誨不能使我出生死
海今此師僧教我出家受增上戒懷羅漢胎得羅漢
果而我違犯深爲可愧第五慚愧弟子旣能晨夕依
教策修而反固遮有違聖說致使道業寸尺無功一

生空過無法制奉顧斯負累亦可深愧第六慚愧帝
王恒以十善化導天下故國土安寧五穀豐熟所以
百姓安家復業出家之人泰然安樂任其禪誦而今
懈惰深是可愧第七慚愧檀越出家所懷解脫爲本
形骸資待衣食爲先所以諸俗爲道興福供給資緣
故隆正業而惑不全失於敬重亦可深愧第八慚愧
良友知識化導見佛因緣令具梵行大經唱示而我
聞諫反以爲讎背逆三歸禮向神俗迷著善導故違
正誨深可爲愧第九慚愧所化諸人由我無德久不
種緣致使開悟莫能津濟故令聽者徒枉功夫縱聞

雜善不獲純淨內心自疾深可慚愧第十慚愧天龍
神鬼護法冥祇我本發心誓度一切故諸天龍擁護
無惱而我愆缺情志不恒唯知負恩但增慚愧

頌曰神膏施唯重玄酒恩未隆明璣隋水上潤玉藍
田中稟天性所極資敬道攸崇羽毛共以勢輪軌相
爲通報德愴前雅酬言愛餘風遵途每多舛顧省能
無忤

極大慚愧門十八

慚愧之義以不及爲本若於正行悉能遵奉則無假
慚愧書云內省不疚何憂何懼又曰心苟無瑕何恤

無家今旣理妙難精觸向乖背一念之間造過無量
過無量故慚愧亦應無量前已略舉大致其中枝派
不可縷悉更立此門使尋文求旨知理無不攝也夫
衆生以我見故不能推美於物引惡在已而於萬善
不能修習見人勝行意欲陵之無慚之甚何得不見
今列位顯之庶可斂迹若見直心行慚愧人我不能
行願彼不作見行布施持戒人開解脫門願其早止
見行忍辱精進人自不能行願早退沒見多聞修定
者自不能行不欲使作見行慈悲喜捨者不能讚勉
欲其不行見菜蔬一食者自不行故勸令退敗見行

伏心人應慚愧法乃勸不行乖八正道見學問誦經人自無此行不使彼作見圍遶禮拜者自懶惰故嫉令不行見有唱導梵音者自不及彼願不爲之見經行頭陀者既不能行反謗毀滅今據叔世設法開化以此爲高義當生信滅罪祈福弘道而今登無畏座開廣笑諛之端飾詞自麗之美高言興色誹誚往還儀容傲佞初無謙遜永不退省我解未深唯詰諮者尋經有謬故經云若爲利養名譽我心愛黨而說法者是名非說若利於彼增信心故滅煩惱故起淨業故知慚知愧開八正路是名善說如過去世有苦岸

比丘說有衆生我人壽命違於佛語命終入阿鼻地獄仰臥伏臥左右脇臥各九百萬億歲爾後更歷諸餘地獄自外徒黨受苦難言故知不依佛教毀謗正法其罪實重當知法師實亦爲難其善則致福無量其惡則獲罪亦重是故法師應須極大慚愧然居在世間養生之急在於衣食由此衣食勞亂極深所須繒纊皮革無不損生殘命著他皮肉還養肉身乃至食噉一粒之食非用功夫無由入口推度前功商量我腹上入下出常流不止而於其中選擇精肥進納軟滑貪嗜美味無羞無恥須臾變改臭不可近將行

將坐如廁不殊何有智者於食生貪若生貪者大須
慚愧與彼畜獸復何取別

頌曰冬狐狸豐毳春蠶緒輕絲形骸翻爲阻心識還
自欺華容羈卅日生平少年時驅車追俠客酌酒弄
妖姬但念目前好安知身後悲惕然一以愧永與情
愛辭

善友勸獎門十九

夫能了除疑惑內發慚愧勸獎之功善知識也今欲
修習萬行非善知識無由進道經云如梅檀葉在伊
羅林其葉則臭伊羅臭葉在梅檀林其葉則香書云

與善人居如入蘭芷之室久而偕芳與惡人居如在
鮑魚之肆與之俱臭又云近墨必緇近朱必赤故知
善友能作佛事是大因緣是同梵行善知識者今能
將我得外淨土惡知識者今能陷我墜於地獄當知
善恩不可酬報夫善惡之理皎然明白但以任情適
道則進趣之理遲善友勸獎便勇猛之心疾經有獎
課之文書有勸學之說當知要行實由勸成故經云
菩薩自身布施亦勸他人令行布施自行持戒忍辱
精進一心智慧亦勸他人令行此事然則勝美之事
欣樂羨仰物之恒情今若徒有願樂之心不行願樂

之事未見其果猶若絕糧思味其於飢渴終無濟益
故略引數條盛行要事以相警誡今有財富室溫家
給人足不勞營覓自然而至復有貧苦飢弊形骸勞
悴終日願於富饒而富饒未嘗暫有以此苦故勸其
布施力厲修福若有衣裘服翫鮮華克備又有尺布
不全垢膩臭雜是以勸獎令施衣服及以室宇若見
甘味珍羞連几重案又有藜藿不充困於水菜所以
勸獎令施飲食若見榮位通顯乘肥衣輕適意自在
復有卑陋猥賤人不齒錄塗炭溝渠坐臥糞穢此苦
可厭勸令修福除滅憍慢奉行謙敬豈可他人常貴

我常在賤若見形貌端正吐言廣利又有面狀矜陋
所言險暴此苦可捨勸令忍辱若見意力彊幹少病
登勞行道無礙有人多患不安所行莫濟見有此苦
勸施醫藥令其進趣故法句經云四時行道得度衆
苦一者少年有力勢時二者有財物時三者遇三寶
福田時四者當計萬物必離散時常行此四必得道
跡應自督課不待他勸

頌曰蘭室改蓬心梅崖變伊草丹青有必渝絲罽豈
常皓曲轅且繩直詭木遂彫藻一簣或成山百里倦
中道隆漢乃王臣失楚信元保勉矣德不孤至言匪

虛造

戒法攝生門二十

前已勸獎於他我今自加課勵凡論課勵要必託境行因若心志浮蕩則進趣無寄然託境行因戒爲其始可謂入聖之初門出俗之正路如垂此訓永處三塗人天長絕是以經云譬如大地長生萬物戒亦如是能生衆生人天華果故經云若無此戒諸善功德皆不得生良以三塗苦報罪障所纏人天勝果堪爲道器欲感勝果非戒不生是以聖人先明此教然三歸五品戒法兩科七眾小學要以三歸爲宗一乘大

教必崇三聚爲本並如經律具顯規猷卓爾憲章行業明逾鑒鏡今粗舉其大致用光恒俗所以發戒之原須依三寶者蓋由佛法僧寶天人所尊歸依生信必能出有若歸邪神反增苦趣故經說云歸佛清信士不歸諸天神故須先定邪正方識逆順經云信爲道元功德之母智是解脫出有之因誠至言也若無此信心志浮虛歸戒不得是以發足立信爲先何謂三歸謂佛法僧此三可重故名爲寶何謂爲佛自覺覺彼無師大智五分法身也何謂爲法能軌能正滅諦涅槃清淨無相也何謂爲僧能和和衆無學功德

自他滅處也何謂爲歸可憑可向也何謂爲寶能招
利樂正心依仗近獲人天遠登無學此則三寶區別
之門若論極教理唯一統照無不周照周等覺謂之
佛寶體無非法謂之法寶至德常和謂之僧寶此乃
體一義三同性三寶衆生解悟信知佛性離此生歿
招與利樂是故一切無不歸憑第一翻邪三歸第二
五戒三歸第三八戒三歸第四十戒第五具戒第六
十善戒第七大菩薩戒此之七戒所防過境近約大
千世界之內一切六根六大並是戒境廣如常說
頌曰金山嚴寶仞瓊琬烈瑤萸牆狐議不窟檐鸚豈

能栖淨花莊思序慧沼盥身倪六羣儻未一七衆固
恒齊端儀有直景正道無傾蹊維宮超以悟襄野竟
何迷

自慶畢故止新門二十一

從前發心已來知至德可歸檢校剋責滅諸惡門疑
惑旣遣慚愧續修勸獎兼行戒德又顯得捨如是之
罪障餐聽若斯之勝法豈得不踊躍歡喜嗟抃自慶
者乎經云八難難度一地獄難二餓鬼難三畜生難
四邊地難五長壽天難六雖得人身盲聾瘖瘂不能
聽受難七雖得人身六情完具而世智辯聰信邪倒

見不信三寶肆意輕侮此身歿已便在三途隨業沈
沒久乃得出時在人道還不正信家生第八前後佛
間不覩正法徒生一世增長邪見具造衆罪尋爾徒
歿是故經云徒生徒歿甚可憐愍奉法行人先崇此
意生歿大事不可自寬今略出自慶數條繫在心管
佛言地獄難免而今同得免離此苦一自慶也佛言
餓鬼難脫而今同得遠於此苦二自慶也佛言畜生
難捨而今同得不樹此因三自慶也佛言生在邊地
不知仁義今在中國修習禮智四自慶也佛言生長
壽夭不知植福福盡命終還墮惡道而今不以世樂

自娛迴以供養五自慶也佛言人身難得一失不返
有過盲龜浮木之譬今得人身六自慶也佛言六根
難具今無缺損七自慶也佛言丈夫男身難得我已
得也佛言女人身者須知佛性則是丈夫我已知也
佛言邪辯難捨我今歸正法也佛言佛前佛後是爲
大難我今相與慷慨立志既見色像又聞正法則同
鹿野滅惑不殊也佛言見佛爲難我今頂禮佛所記
像功用等倫也佛言聞法爲難我今備得聞也佛言
出家爲難我今具隨衆也佛言出家專信倍復爲難
我今一心無敢二見敬法愛法以法爲師經中偈言

惟念過去世供養爲輕微蒙報歷遐劫餘福值天師
淨慧斷生死癡愛銷無遺佛恩流無窮是故重自歸
頌曰春非我春秋非秋一經長夜每悠悠陶形練氣
住元造啓蒙夷阻出重幽榮公三樂非爲曠箕生五
福豈能求靈姿妙境往難集微言至道此云修年逢
生幸曾以慶盈愆貳過儻知憂畢故斷新別苦海希
賢庶善憑智流

大忍惡對門二十二

夫道從苦生不由樂果德憑功建非情所集故經云
忍辱第一道於諸衆生心無礙故以其在苦則多礙

多惱起不善業今所以得無礙者良由在礙而修無
礙故礙而不爲礙既於礙而無所礙豈非忍力之所
致乎經云娑婆世界五濁之刹五痛五燒具諸惡報
是故發大乘者多來此土以救苦爲資糧以拔惱爲
要行此土一日修善勝於他方淨國百千萬劫所以
爾者良由極苦之地心不及善而能於劇苦之中卓
然發意忍苦受辱豈不奇哉所謂火中生蓮華此實
爲希有他方淨土無修福地所以不及此土何者淨
國七財豐溢不假布施攝貧窮也淨國律儀圓淨不
假持戒攝毀禁也淨國則無辱無忍穢土無事非辱

在辱能忍勝他方也淨國精進如救頭然不假翹勤
攝懈怠也淨國之人入法流水念念修順無出入觀
不假寂定攝亂意也淨國智慧明滿不假才巧說攝
愚癡也又淨國之人非無弘誓但弘誓之功不及淨
土四攝四等例同無用淨國樂故則救苦之心薄惡
土苦故則進善之心猛故經云行於非道通達佛道
也夫欲發廣大心行菩薩行自非履危涉險備受艱
難蹈熾火歷冰霜嬰苦切甘楚毒於萬苦中而能忍
受者則道場可踐若無此惱忍何從生藉此煩惱起
我諸善所謂塵勞之儔爲如來種當知忍者有力大

人功德之本所謂忍痛癢忍思想忍疾病忍飢苦忍
疲勞忍寒暑忍憂悲忍熱惱忍惡罵無恥辱忍搥打
無恚礙忍貪欲無愛著忍憍慢無背道忍所難忍忍
所難行忍所難作忍所難辦能行此者真可謂大忍
辱矣

頌曰春山之下玉柢禽漢水之陽璧千金清業神居
德非重潔已愚侶道已深愛憎喜怒生而習榮華芳
旨世所欽鴻才巨力萬夫敵誰肯制此方寸心逸驥
狂兇獷不御繫羈密柙儻能禁遣情遺事復何想寂
然無待恣幽尋

緣境無礙門二十三

經云在俗則謂之爲縛在道則謂之爲解解卽無礙所致縛卽資待所招今若欲有待於無待則有待更煩無待於無待則有待自遣有待旣遣則無礙之門可入若志在於資養便覩縛纏更重但衆生凡類觸向多阻不資於物則自濟無方資於物者累之重也生累纏繞解脫何由今旣深知其累累實爲苦何以知之今欲陸行非車舉人馬不動一累礙也今欲水遊非舟航不移二累礙也今欲養身非衣裘屋宅則無所憑託三累礙也今欲養命非粳糧黍粟五味柔

軟則無所資待四累礙也今欲修習一慧髮像無向五累礙也今欲求見一佛及一淨土發奇特心冥漠不見六累礙也今欲徹視十方障礙滿目七累礙也今欲求佛聖智以除障惑近是衆生心行而我不覩八累礙也今欲披文尋義雖課心力近在淺言不達意旨九累礙也今欲誦習經典受已忘漏十累礙也凡此累礙其事無量聖人所無礙自在者由何而致實由遠諸塵勞自策爲本是所資待莫不勤役自辦不假於他而他爲我用所謂讓而得者則其理通求而獲者則其理滯菩薩不求自利但欲利益衆生是

以其利在已而得無礙衆生常利我忘彼所以恒縛而無解聖是可求而得非是永隔無津今若欲學聖捨凡者當遵聖人所習雖其途無量然津濟要趣唯一解脫耳故經云若自無縛欲解彼縛斯有是處今欲學菩薩道必須棄凡夫縛凡夫縛者唯願得五欲縱意自在實大縛也菩薩行人棄之不顧經云不得畜養奴婢畜生當自翹勤出離生處若假於他他還縛我無解脫期今云無奴不立無婢不辦此乃氣力強梁之時一旦臥牀百事同棄自救不暇何憂及人宜自勉勵則解脫之門易可登耳

頌曰况象惚物終不名龍舉鸞集竟誰辯絕智亾身孰爲礙韜名戢曜故能顯匪日匪月灼以懸安飛安翔虛而踐壁石無間恣出沒水火有性任舒卷敷教應俗驚泉流現迹依方迅風轉大哉超世莫與羣希轅慕舜宜自勉

一志努力門二十四

從初辨德極於無礙善惡二途凡聖苦樂明了審諦斯言備矣唯應努力勤而行之經云感傷世間貪意長流沒於愛欲之海吾獨欲反其源故自勉而特出是以世世勤苦不以爲勞經云我與阿難空王佛所

共發菩提心我常勤精進所以速成正覺又云得正
法智已以無疲厭心爲衆生說斯可謂努力矣夫衆
生流轉三有觸苦相纏所以情識闇弱慮淺多迷每
一修善怯退遑擾念念之間百變乖舛自非勸之以
努力獎之以剛幹則勇銳驍果之心不發經云衆生
與無明怨賊鬪戰亦不異世間剋敵相禦世間則須
金鉦壯其氣鼓鍾激其忿鬱佛增其怒決烈成其力
不資此發勇不假此振威何能摧鳴條之戰拉牧野
之師乎今與煩惱共戰當集無漏之智命無畏之師
控道品之衆禦六度之侶建道場之幡擊甘露之鼓

著弘誓鎧胄被忍辱袍甲握智慧弓刀執堅固箭盾
精進督怠惰翹勤課不及發行登懽喜稅駕頓法雲
種智斷其勇方便運其略於是無明老灰之賊協附
四魔之軍影響波旬因倚天女憑帶鬼神億千萬衆
擔山吐火雷電四繞欲入闇惑之旅退金剛之師由
乎菩薩忍調無想積德久善魔怨稽伏一念努力豁
然大明非法王壞正法王勝此並經中之盛事若不
努力何由辦也如人營家晨起夜寐劬勞督課便自
室內盈實飢寒不切但能努力無所不濟出世妙行
事不殊俗若小努力微復加意三明六通不足爲難

更運方便重課心形信順之忍漸深自至豈得空捨
一生虛過三塗切已力無所施方復生悔何嗟及矣
所以努力一門貫通前後位心極行唯此而已願幽
明聖鑒照覽窮途故敢發言託文現意
頌曰像北二山尚有移河中一洲亦可爲精誠必至
霜塵下意氣所感金石離有子刺掌修名立王生擢
髮美譽垂自來勤心少騫墜何不努力出憂危勝幡
法鼓縈且擊智師道衆紛以馳有常無我儼旣列無
明有縛孰能窺

禮舍利寶塔門二十五

大聖詮化隨機感益譬若一音說法各得其解是故
應以現生蒙利者所以降神母胎誕聖王宮應以出
家蒙利者所以捨金輪位剃除鬚髮應以相好蒙利
者所以現成正覺坐菩提樹應以實相蒙利者所以
三轉法輪十二部經應以滅度蒙利者所以雙樹潛
輝現於涅槃良由衆生障業煩多是故聖化隨應不
一然則現於涅槃者復是增發悲戀之心以悲慕故
善心濃到凡禮拜像塔皆宜感發悲心潛然思慕慘
切其情追想正法我不餐仰泣想如來不親音旨如
入祖禰之廟覩靈若在歔歔無顏如來慇懃令我等

具諸苦行而我違背自墮惡道在於像末未蒙解脫
以苦報故憶如來恩是以今各歸心於此像塔嗚咽
涕零慚顏哽慟至心奉爲至尊皇后皇太子七廟聖
靈今日信施龍神八部廣及一切劇苦衆生敬禮十
方三世一切諸刹土中所有如來形像靈廟敬禮釋
迦如來一切現在靈骨舍利敬禮如來現在頂骨舍
利敬禮如來現在髑蓋舍利敬禮如來現在眼睛舍
利敬禮如來現在一切紺髮紅爪舍利敬禮如來現
在一切指骨舍利敬禮如來現在一切牙齒舍利敬
禮如來現在衣鉢水瓶錫杖衆具敬禮過去四佛生

地并行坐遺迹敬禮如來得道樹寶塔敬禮如來轉
法輪處寶塔敬禮如來般涅槃處寶塔敬禮如來滅
後阿育王造八萬四千塔敬禮阿育王所造無量諸
佛像敬禮天上人間海中龍宮一切像塔敬禮此國
諸州諸瑞聖像敬禮此國諸寺諸山無量靈像敬禮
天上人間海中無量形像願一切衆生不在佛前佛
後常見佛生常見佛出家常見佛得道常見佛涅槃
能建立是無量像塔盡於來際佛事不絕
頌曰越人鑄金誠有思魏后粧木亦云悲中賢小節
猶可戀去聖彌遠情彌滋祇樹蕭條多宿楚王宮寂

實渺遺基設像居室若有望開儀駐景暖如之連卿
共日獨先後道悠命舛將無時傾懷結想惻以慕垂
靈寫照拂塵疑

敬重正法門二十六

諸法本空寂滅無說以因緣故現有文字當知文字
經典本在破病滅惑爲先惑既八萬四千故使教門
亦有八萬四千法藏至於病銷惑遣藥亦隨亾如椽
喻者可以情悉然羣生沈罔隨言封滯由此見故教
藥常陳所以金簡盈於寶殿玉軸煥於神宮辯析空
有於假實表發權智於無方故如來一代四十九年

隨緣示教種種說法及於涅槃但有聲教計隨言說
必致淪亾然以義理談玄正宗無昧言雖得喪金旨
難乖故立法依用永刊定天魔外道莫敢侵陵自慧
日已沈法雲遐布非夫簡冊無由獻功尊大迦葉法
門英雋擊鍾聲告召集無學千僧一夏撰結遺言十
二義求三藏文攝多羅葉典其量莫思蘊積西夏將
及千載時運漸染東翻漢朝公彼至今年垂六百雜
錄正經七千餘卷詞義明敏談味無遺近則安國利
人遠則超凡證聖備如卷部智者尋之至心奉爲至
尊皇后皇太子七廟聖靈天龍八部乃至十方一切

劇苦衆生敬禮一切真如正法藏敬禮十方一切諸佛所說法藏敬禮過去一切諸佛法藏敬禮賢劫初佛拘樓孫如來天龍宮法藏敬禮拘那含牟尼佛天龍宮中法藏敬禮迦葉佛天龍宮中一切法藏敬禮釋迦如來天龍宮一切法藏敬禮西印度黑峰山寺一切法藏敬禮沮渠國大乘十二部法藏敬禮北印度石壁八字捨身法藏敬神禮州大國一切衆藏經典敬禮易州石經朔州恒安石窟經像敬禮一切受持三藏諸法師等敬禮一切禪師律師讀誦經典諸行人等願一切含靈入如是法門常能總持廣說教

化通達無礙

頌曰出不自戶將何由行不以法欲焉修之燕入楚待駿足陵河越海寄輕舟仁言爲利壯已博聖道弘濟邈難求通明洞燭煥會景深凝廣潤湛淵流翼善開賢敷教義照蒙啓惑滌煩憂功成弗有名弗居淡然無執與化遊

奉養僧田門二十七

僧稱福田羣道宗尚斯何故耶良由發蒙俗之幽心啓正道之遐趣拯沈淪而將濟於三有御法網而弘護於萬齡由是道被天下德光四俗能生善種號曰

福田德響捷槌又稱應供心乖理義行越法科則顯
垂剝落之容幽受空樹之譬及與施主爲離隙與骨
肉爲瘡疣熱血之相可尋石女之倫不遠僧護佛藏
明言不迷智論大經清範攸屬固當日須三省事必
九思念念策心無時寧舍方可入三乘之一位預三
寶之一員盛德可觀六道歸依而出有高行難擬七
衆相從爲福田豈非形寄域中情超域外者也流俗
纏糾封附昏迷處處生著何能遠出是以樹立僧寶
爲俗良田令興福力得出生死不徒設也然佛超累
表作範區中爲物受供而實不受法在除惑清淨非

情供養感果自隨生業僧舍凡聖形繫往因縱成無
學猶嬰善報身謝無餘方出諸有今以形累有緣多
須資待故凡施者教多在僧然供養於僧備有三寶
故佛有言隨順我語供養佛也爲解脫故供養法也
衆僧受用供養僧也有斯理義故名衆僧良福田矣
奉爲至尊皇后皇太子七廟聖靈天龍八部乃至十
方一切劇苦衆生敬禮十方一切僧寶敬禮當來下
生佛兜率天彌勒菩薩僧敬禮遊方大士文殊師利
菩薩僧敬禮救苦大士觀世音菩薩僧敬禮護法大
士普賢菩薩僧敬禮滅罪大士虛空藏菩薩僧敬禮

十方一切行大道心菩薩僧敬禮十方一切行緣覺
心辟支佛僧敬禮十方一切行下乘者諸聲聞僧敬
禮賓頭盧闍住法萬載諸聲聞僧敬禮佛子羅睺羅
住法萬載諸聲聞僧敬禮剡州山海九億萬住法萬
載諸聲聞僧敬禮三千界內見在一切諸凡聖僧願
一切含靈常與賢聖同乘正道開智生福不墜惡趣
生生遭遇爲善知識拔除煩惱得出諸有

頌曰五玉已潤談而信八桂雖芳風乃掃妙理至言
唯聖寶不自伊人孰弘道照空觀法識遷流撫俗瞻
光厭生老絕滅情嗜斷權怡縱落豪榮棄彫藻親愛
倏忽信風煙財利悠悠若塵草測以龍雲豈曰高濯
足江漢更慚皓

勸請增進門二十八

勸請者殷懃之至意也由發殷懃之意則願善之情
深矣是故於一切纖微之善咸須殷懃勸請增進令
生慧行不容中廢然勸請有二勸請衆生修行戒善
具諸德本勸請諸佛救護衆生說法久住十方四惡
趣我今悉勸請修持諸戒行獲得於人身十方一切
人我今悉勸請令修十善業得生於天上十方諸天
人我今悉勸請登立正定聚得離於惡道十方諸學

人我今悉勸請覺察諸煩惱速證無學地十方阿羅漢我今悉勸請知非究竟位唯有一佛乘十方辟支佛我今悉勸請成就大悲智教化諸衆生人天二乘衆我今悉勸請體覺如來藏修習菩薩行一切諸菩薩我今悉勸請修行十度行速登於十地兜率天菩薩我今悉勸請常轉不退輪速下度羣生菩薩智未明我今悉勸請金剛滅塵累顯發真實相十方一切佛初成正覺者我請轉法輪安樂諸衆生十方一切佛若欲捨壽命我今歸命請願久住於世如是佛菩薩我今皆勸請發此殷懃心是故稽首禮

頌曰俟河之清逢聖朝靈智俯接一其遙白日馳光不流照葵藿微志徒傾翹遍盈空有盡三界綿塞宇宙罄八遠德光業遂升至覺寂寞常住獨能超前灼欲火思雲露沈汨使水望舟橋弘慈廣度昔有誓法輪道御且徐驪

隨喜萬善門二十九

衆生以愚惑故多懷嫉妬增上之心是以見人行善則興惡想摧毀破壞不令成就然彼前人未必損行而此嫉者妄增惱熱增長惑業生死不絕是以聖人調心制意行此隨喜亦復勸請衆生如說奉行十方

一切衆所有微細善仁義及禮智孝養謙恭敬慈和
及愛敬廉貞清潔行若有如是善我今悉隨喜離欲
在家人奉修如來戒三歸五八戒十善菩薩戒清淨
諸律儀離惡名聞者如是諸功德我今悉隨喜飯僧
施法衣浴除煩惱垢救攝諸貧窮飢寒窮塞者疾病
艱危苦施藥悲憐業如是等功德我今悉隨喜曠路
作好井橋船度人物園林池花果施佛并供僧渴乏
除熱惱其福實無量如是等功德我今悉隨喜造經
流法教然燈發慧明習誦及轉讀決了諸義趣若復
爲人說倍增歡喜心如是諸功德我今悉隨喜建立

諸塔廟堂殿及寶刹彩畫及木像金銀銅石等傳寫
諸相好顯示於法身如是諸功德我今悉隨喜若有
造僧坊牀帳及臥具令彼息心者安意於禪林出入
苦空門次第寂滅觀如是諸功德我今悉隨喜如來
大慈悲善說諸法門發生隨喜行令我等修學隨喜
諸聲聞忍苦度生歿隨喜諸菩薩不捨惡道受隨喜
十方佛無畏天人尊能於三界獄引出諸衆生願令
衆生類悉得於佛道是故我隨喜稽首禮諸佛

頌曰聞善若已燭良書見賢思齊美通誥感幽動地
孝有誠殞首流腸忠爲操振禮摛文弘憲則機謀颺

勇靜姦暴明白入素志冲閒高論窮微契神奧捐軀
濟物不邀名輕財貴義豈期報百行萬善紛塗軌求
誠罄想畢歡蹈

迴向佛道門三十

言迴向者以不著爲義原一切衆生備修萬行捨身
命財所以不得解脫生歿者皆緣耽著果報不能捨
離若能不執其心修行攝度隨有微福迴施羣生向
於佛道者則於果報不復生著便於生歿蕭然解脫
故經云如所說修行迴向爲大利是以一切所作善
業皆應迴向兼勸衆生不著果報何者卽此身形果

報之本終日養飼莊嚴彫飾要必當歿徒爲保著自
非愚闇所以貪受此身少有慧明何得無時不厭以
是智者撫臆論心不容貪著迴流生歿十方諸衆生
所行微善業仁孝及謙敬慈愛柔和等忠正修禮智
矜逮賑孤窮如是世俗善悉迴向佛道一切諸外道
種種勤苦行五熱灸其身投巖赴水火反縛塗灰等
無量諸邪見今皆爲迴向同歸正覺道一切清信士
歸戒行十善乃至諸女人亦能修福德又能善說法
開化衆妙福迴向施羣生共成無上道一切弟子衆
聞聲卽解悟善來成比丘乃至四道果方便及初觀

唐弘明集卷之二十七
苦空非常想亦迴施羣生共向無上道十方諸辟支
自然成緣覺深悟在別世曉了因緣法隱顯化衆生
獨處樂善寂如是兼一切盡迴向佛道十方諸菩薩
讀誦於經法入禪出禪者勸總行衆善如是等三善
一切衆德本亦迴施衆生歸向無上道一切諸善等
乃至賢聖果解空未能窮有無不雙盡悉令與一切
同入真妙境著迴有相心皆向解脫道如是諸菩薩
我今勸迴向發此無著心是故稽首禮

頌曰悠悠九土各異形擾擾四俗非一情驅車秣馬
徇世業市交鬻義銜虛名三墨紛紜殊不會七儒委
鬱曾未并吉凶拘忌廼數術取與離合實縱橫朝日
夕月竟何取投巖赴火空捐生咄嗟失道爾迴駕沔
彼流水趣東瀛

發願莊嚴門三十一

原衆惡所起皆緣意地貪瞋癡也自害害他勿過於
此故經號爲根本三毒能煩能惱勞擾身心於緣起
惡三三九種然此九種義通善惡三善根生名善業
道三不善根生名惡業道是故行人常一其心不令
動亂微起相見卽自覺察守護六根不令塵染常發
弘願以自莊嚴願一切衆生皆從今日乃至菩提眼

常不看貪姪邪豔惑人之色不看瞋恚醜狀屠裂愚
癡疑闇倨慢邪衆之色願見一切十方常住法身之
色菩薩下生八相之色如來相好聖衆和會善集之
色願一切衆生耳常不聞悲啼愁嘆聲地獄苦楚聲
餓鬼畜生受苦聲八苦交對聲四百四病起發聲八
萬四千塵勞聲願耳常聞諸佛說法八音聲八萬四
千波羅蜜聲三乘聖果十地功德如是等聲願一切
衆生鼻常不聞殺生滋味飲食之氣三十六物革囊
之氣發欲羅綺脂澤之氣五辛能薰九相尸氣願鼻
常聞十方世界諸樹草木之香五戒八戒十善六念

諸德香學無學人十地五分十力八萬四千諸度無
漏之香十方諸佛說法之香願一切衆生舌恒不嘗
衆生有命身肉雜味能生煩惱滋味願舌恒嘗甘露
不歎之味天自然食在其舌根變成上味諸佛所食
之味法喜禪悅之味解脫泥洹最上勝味願一切衆
生身常不覺邪姪細滑生欲樂觸不覺鑊湯寒冰之
觸餓鬼畜生諸苦惱觸四百四病寒熱風霜蚤虫蚤
虱飢渴困苦等觸願身常覺清涼強健心悟安隱證
道飛行八自在觸願一切衆生皆從今日乃至菩提
意常覺知九十八使八萬四千塵勞之法十惡五逆

廣弘明集卷之二十七
三十七
九十六種邪師之法三塗可厭生死大苦願意常知
一切衆生皆有佛性佛爲醫王法爲良藥僧爲看病
者爲諸衆生治生死患令得解脫心常無礙空有不
染

頌曰心所期兮彼之岸何事浮俗久淹迨照慧日兮
駕法雲騰危城兮出塵館芳珠燁兮聞歲時寶樹颺
兮警昏日清露搏甘永以挹喜園流采常爲玩無待
殷鼎方丈羞安用秦箏織指彈勤誠款願長不渝習
苦塵勞從此捍

廣弘明集卷第二十七下



